

EKALESIA FAAPOTOPOTOGA KERISIANO I AMERIKA SAMOA

OFISA O A'OA'OGA KERISIANO



VASEGA LAITI



AUKUSO - TESEMA

2023

TUSI A'OGA ASO SA VASEGA LAITI

AUKUSO----TESEMA 2023

FA'ASOLOGA O MATAUPU

ASO/MASINA	MATAUPU	TUSI FAITAU
AUKUSO 06,2023	“O le manuia o le tagata amiotonu”	Salamo 1:1-3
AUKUSO 13,2023	“O le malaia o le tagata amioleaga”	Salamo 1:4-6
AUKUSO 20,2023	“ Ua fa'atusaina le Ali'i i le leoleo mamoe”	Salamo 23:1-6

AUKUSO27,2023 **MATAUPU FA'AMANATU---AUKUSO**

SETEMA 03,2023	“O matua o faiaoga muamua o le fanau”	Fa'ataoto1:7-9
	(Aso sa talalelei)	

SETEMA 10,2023	“Ia lelei a outou amio”	Roma 12:1-2
-----------------------	--------------------------------	--------------------

SETEMA 17,2023	“O Iesu le leoleo mamoe lelei”	Ioane 10:1-6
-----------------------	---------------------------------------	---------------------

SETEMA 24,2023 **MATAUPU FA'AMANATU----SETEMA**

OKETOPA **MALOLOGA O LE LOTU TAMAITI**

NOVEMA 05,2023	“O le aoga o le Poto”	Fa'ataoto 2:10-15
-----------------------	------------------------------	--------------------------

NOVEMA 12,2023	“Ia usiusita'i i poloaiga a le Atua”	Fa'ataoto 3:1-4
-----------------------	---	------------------------

NOVEMA 19,2023	“Ia fiafia e o i le fale o le Ali'i”	Salamo 122:1-5
-----------------------	---	-----------------------

(Vaiaso Aso fa'afetai)

NOVEMA 26,2023 **MATAUPU FA'AMANATU----NOVEMA**

TESEMA 03,2023	“Ua fanau le tamatane, ua fa'aigoa ia Iesu”	Mataio 1:18-21
-----------------------	--	-----------------------

TESEMA 10,2023	“O le Talalelei e olioli ai nu'u uma”	Luka 2:8-13
-----------------------	--	--------------------

TESEMA 17,2023 **SU'EGA O LE AFA MULIMULI O LE TAUSAGA**

MANUIA LE KERISIMASI MA LE TAUSAGA FOU, FEILOA'I IA FEPUARI 2024

ASO SA : AUKUSO 06, 2023
MATAUPU : “O LE MANUIA O LE TAGATA AMIOTONU”
TUSI FAITAU : SALAMO 1: 1-3

SINI: *Ia malamalama le fanau e le mafai ona maua le amiotonu pe a le savali i ala o le Atua ma tausisi i Tulafono ua uma ona fa'ailoa mai e ola ma savavali ai.*

FESOASOANI MO LE FAIAOGA : E fa'atalofa ma fa'afeiloa'i atu i lau susuga a le faiaoga malo le onosa'i ma le fa'amalosi i lenei taeao. Manaia 'ae amata i se tatalo pu'upu'u ona su'e loa lea o le tusi faitau 'ae tauloto fa'atasi fuaiupu e tolu. Fa'amalamalama lelei i fanau le upu manuia, so'o se tagata amiotonu a e manuia. Manaia fo'i 'ae fa'a talanoa le upu amiotonu, ia iloa e fanau o le upu amiotonu o lo'o fausia i ni upu se lua, amio ma le tonu. A lelei le amio ma sa'o fa'aiuga fai e mautinoa le ta'u o lena tagata o le tagata amiotonu. Ia manino le fanau o le amiotonu e mafua ma amata mai le Atua.

TAULOTO: Salamo 1: 1 *“Amui'a le tagata e le savali i le filifiliga a e amioleaga, e le tu fo'i o ia i le ala o e agasala, e le nofo i le nofoa o e tauemu”*

FESOASONI MO LE MATAUPU: O lo'o manino le ulua'i pese lea a le fai Salamo, foliga mai o le pese po'o fuaiupu e tolu lea na faitauina o se fa'amanuiaga. A silasila lelei i upu o lo'o amata i le upu **Amuia**, le upu o lo'o fa'amatala ai le atoa o le faitauga. Fa'a Amuia iai aua e le savali i le filifiliga a tagata amioleaga, e le tu i le ala o tagata agasala ma e le nofo foi i le nofoa o tagata tauemu (faifai). Afai la e le mulimuli i ituaiga tagata fa'apea, lea la e fa'amatala i le fuaiupu e lua le mea e naunau iai ia fa'amuamua. E manatu ma naunau i le Tulafono a le Ali'i, e mafaufau iai i taimi uma o lona ola ina ia fai o ia ma tagata amiotonu. A'o lo'o manino mai fo'i i le fuaiupu e tolu le fa'atusa o le tagata e mamao a mea le lelei ma lona ola. Faimai e pei o se laau, e toto i autafa o le vaitafe, e fua lelei aua e maua le meaai lelei mai le vai. E le toulu ona lau ma manuia mea uma na te faia. O fa'amanuiaga na e ta'uamiotonuina ai le tagata, O tala na tu'ufa'atasi ina ua o ese le nu'u o Isaraelu mai Papelonia, ma ua toe fa'amanatu ina ia 'aua ne'i mamao ma le Atua. Na'o le Atua a e maua ai le Amiotonu ma le Manuia. E ui a ina fa'atafea i Papelonia ona o le usita'i ma fa'alogo i le Atua, 'ae na tumau a le alofa o le Atua ina ua Ia toe aumaia mai Papelonia sa nofo pologa ai. Atonu fo'i o se tulaga lea na amata ai le ulua'i Salamo i le toe fa'amanatu i tagata o le nu'u taua o le le mulimuli ma naunau i filifiliga a e amioleaga.

A'OA'OGA: 1, 'Aua le naunau i fa'atosina o le olaga.

2, Ia toaga e tatalo i le Atua e fesoasoani mai ma fa'atonu mai ina ia 'aua ne'i faia mea sese.

3. E manuia le tamaititi fa'alogo ma usita'i i matua.

4. Fa'aopopo ane e lau susuga nisi a'oa'oga taua ma aoga mo fanau.

PESE: Pese ma Viiga # fuaiupu 1

TATALO: *Ia fa'amalamala atili e le Agaga o lau Afio, le fa'asoa o lenei taeao mo nai a matou fanau. Ia iloa ma le mautinoa o Lau Afio e tupu tele ai lo latou manuia ma tonu ai la latou amio. Ona o Iesu le Ali'i alofa tele mai. Amene!*

ASO SA : AUKUSO 13,2023
MATAUPU : “O LE MALAIA O LE TAGATA AMIOLEAGA”
TUSI FAITAU : SALAMO 1 : 4-6

SINI: Ia a'oa'oina le fanau so'o se tagata a e leaga lana amio e malaia lona olaga. Ia manino fo'i fanau e le o le finagalo o le Atua ia amioleaga le tagata. O le fa'aiuga a ale tagata e malaia ai.

TAULOTO: Salamo 1 : 5; “ O le mea lea e le tutu ai o e amioleaga i le fa’amasinoga, e le tutu fo’i tagata agasala i le fa’apotopotoga a e amiotonu.

FESOASOANI MO LE FAIAOGA: Malo le fa’amalolosi fa’afetai fo’i le onosa’i i lavasiga sa feagai ai o lona vaiaso ua alu. Ia fa’amalosia pea o outou loto e fiafia e galulue i lenei galuega fa’a faiaoga Aso Sa. Ia mautinoa e le vale lava lo outou tui mai le Atua o le ana le galuega. Ia augofie pea lagona e faitau ma su’esu’e i le mataupu ina ia faigofie ona fa’amatala le mataupu. Manuia tapenaga o le a feagai ai.

SINA FESOASOANI MO LE MATAUPU: Ua mae’a le ata o le manuia o le tagata amiotonu sa fa’amatala i lona Aso Sa ua mavae. A’o lea ua tatou iai i lenei Aso Sa i le ata e fa’afeagai ma le manuia o le malaia. Ia manino lelei o le Salamo lenei o lo’o aumai ai tala fa’amanatu a le Fai Salamo mo le nu’u o le Atua lea ua toe fo’i. Sa i Papelonia ina ua le fa’agalalo i le Atua, ua fa’atusa o aputi o saito, lona uiga o mea e le taulia ua agi mai le matagi ma lelea solo ai. O le ata o le tagata e femoumoua’i ona lagona, e le tumau i se mea e tasi. E mana’o e fai a le mea e loto iai, ma fiafia e ola ai. Ua aumaia e le fai Salamo le ato o le le talia o tagata le amiotonu i le fa’amasinoga ma le le mafai lava ona tutu tagata agasala i le fa’apotopotoga a tagata amiotonu. E mafua aua o mea uma e faia e le tagata e silafia uma e le Atua, a’o le Atua fo’i na te aumaia le tui mo le tagata amioleaga, faimai e fano lona ala, o le malaia lava lea. E tele mea sese ma leaga e faia e le tagata ma le manatu e sa’o ma lelei peitai e leaga. O le fa’amanatu fo’i lea a le mataupu o lenei Aso Sa mo fanau, ia aloalo ese ma mea e malaia ai.

A’OA’OGA:

1. Aua le mapu le ola feso’ota’i i le Atua e ala i le tatalo, pe a o’o mai mea leaga e malaia ai.
2. ‘Aua le mapu le ola fa’afetaia pea le Atua ona o le mafuta mai i taimi e fa’avaivai ai.
3. ‘Aua le mulimuli fua i taiga sese a isi tamaiti, ‘ae fa’amuamua a le alofa i matua ma aiga.
4. Atonu fo’i e iai nisi a’oa’oga e fesoasoani pea mo nai fanau e fa’aopoopo ane i nai a’oa’oga na.

PESE: E lelei, e lelei, e lelei tele le Atua, (I haha)

E lelei, e lelei, e lelei tele le Atua,
E lelei tele le Atua e alofa ia i taua,
Fa’apei o Isaraelu a’o i ai i le vaomatua.

TATALO: *Matou te le fia malaia lava le Atua, matou te manana’o ia matou amiotonu ma amio sa’o aua o lau Afio e sa’o ma tonu lava. Fa’amanuia fanau ma ia fa’amamao o latou loto ma mea leaga o le ola. Fa’amagalo sese ma agasala ma ia ta’uaogaina o latou talavou ma ia taula pea ola i lau Afio e manuia ai. Ona o Iesu. Amene*

ASO SA : AUKUSO 20, 2023

MATAUPU : “UA FA’ATUSAINA LE ALI’I I LE LEOLEO MAMOE”

TUSI FAITAU : SALAMO 23 : 1-6

SINI: Ia malamalama tamaiti i le galuega a leoleo mamoe, o le galuega alofa mo mamoe ua o ese ma le pa mamoe ia toe aumai i totonu ma pui-pui mamoe mai le osofaia e manu fea’i. Le galuega alofa lona a Iesu na ta’u ai o ia o le leoleo mamoe lelei.

TAULOTO: SALAMO 1:1-3 “O le Ali’i o lo’u leoleo mamoe o ia; e leai se mea ou te mativa ai; na te ave a’u i le mea o iai le vao mu’a ou te taoto ai. Na te ta’ita’i ia te a’u i tafatafa o vai e tafe lemu; na te fa’afo’isia mai lo’u agaga; na te ta’ita’i ia te a’u i ala o le amiotonu ona o lona suafa.”

FESOASOANI MO LE FAIAOGA: E le fou le fa’alogo i le Salamo lea e 23, o le Salamo ua masani ai le to’atele o fanau ua fai fo’i ma tauloto masani. Ona o le vasega e laiti tamaiti, ia iloa lelei e tamaiti le uiga o le avea ma leoleo mamoe. Iesu na ta’u o le leoleo mamoe aua o lana galuega na feagai ma Ia, o le galuega fa’a leoleo mamoe. E alofa, e le mafai ona mamao ese ma mamoe. Manaia ‘ae tusi fo’i se ata o se leoleo mamoe ma lona to’oto’o ina ia iloa e tamaiti foliga o le leoleo mamoe. Ia augofie pea ou lagona e feagai ai ma le mataupu o lenei Aso Sa. Manuia le fa’asoa atu i fanau.

FESOASOANI MO LE MATAUPU: Tusi o Salamo o lo’o taoto i le vaega o tusitusiga a le Poto. O lo’o aumaia e le Fai Salamo le fa’atusaina o Iesu o le leoleo mamoe. O lo’o amata a le faitauga i le fa’apea mai, “O le Ali’i o lo’u leoleo mamoe o Ia.” Manatu le ‘au suesue o la feagaiga Tuai o Tavita na tusia le salamo le a’o avea ma tupu. Sa avea fo’i o ia ma leoleo mamoe a lona tama a’o le’i filifilia e avea ma tupu o Isaraelu. Tavita fo’i na feagai ma le tele o fa’afitauli a’o feagai ma le nu’u. A ua ia matua talitonu ana le seanoa le Ali’i, sa leoleo ma puipui mai ia te ia, semanu e le manuia lana ta’ita’iga o le nu’u o le Atua. O mea uma sa feagai ma ia sa le mativa, ave i le mea lafulemu e taoto ai, e ta’ita’i i autafa o le vaitafe e fa’ainu ma fa’a taele ai. O a mea uma e fetai’i ma mamoe e iai a le leoleo mamoe, e tausi fa’amaoni i mamoe. O le ata sa fa’amatala ai le tulaga sa iai le nu’u, sa o ese ma le Atua, sa i lalo o le ta’itai’ga a isi malo ma o latou ta’ita’i. Sa manatu mama i le alofa tausi mai o le Atua, ‘ae ina ua toe fo’i mai o latou lava eleele ona latou talitonu lea i le alofa o le Atua. E le mavae mai latou, lea a ua toe fo’i ma ua latou o ese ma le tele o fa’afitauli sa feagai ai a’o fa’aaunuu a Papelonia. E leoleo mai pea le Ali’i i a i tatou, po’o fea lava e aga iai le tagata ma ana mea e fai pe lelei pe leaga e leoleo mai a le Ali’i ma puipui mai i ala uma. O lo’o fa’amatala mai e le faitauga mea uma ma galuega alofa a le leoleo mamoe sili o Iesu e faia i ana mamoe. O lo’o aumaia fa’a galuega tausi mamoe, a’o le autu atoa o le faitauga o le avea o Iesu ma leoleo mamoe lelei io tatou tagata uma.

A’OA’OGA:

1. Ia aloalo ese ma tagata fa’aosooso ma fa’amaite i mea leaga.
2. Ia ola ma le mautinoa e leoleo mai pea iesu i ala uma tatou te ui ai.
3. Tatau fo’i ona tatou alolofa atu i isi e pei o se leoleo mamoe lelei.
4. Fai se galuega fa’a leoleo mamoe i a tatou uo pe afai ua le lelei amio o lo’o fai.
5. Fa’aopopo ane e lau susuga nisi a’oa’oga mo fanau.

PESE: Pese ma Viiga # 303 fuaiupu muamua.

TATALO: A’oa’o mai pea ina ia avea i matou ma leoleo mamoe lelei, ma ia matou iloaina o lo’o e leoleoina i matou i taimi ma aso uma o lo matou ola. Fa’amagalo i lo matou fa’atamala ma fa’agalo lou alofa le uma. Fa’amalamalama fanau ma ia fiafia e faia mea uma mo sou viiga. Ona o Iesu. Amene!

Fa’amanuia le Atua i lau susuga fa’apea le vasega i lenei taeao

ASO SA : AUKUSO 27, 2023

MATAUPU FA’AMANATU/ SUEGA MUAMUA

SINI AUTU : O le avanoa lelei e toe fa'amanatu ai i fanau mataupu sa a'oa'oina ai i Aso Sa e tolu o le masina o Aukuso.

FA'ATINOGA O LE MATAUPU FA'AMANATU: O lo'o i lau susuga lava a le faiaoga le faitalia e mo le fa'atinoia o le suega e pei ona masani mai ai i le faiga o sue'ga ua mavae. E ia te oe fo'i le pule i le aofa'i o togi mo le sue'ga. E taua le fa'amaumau togi o nai tamaiti ma fa'amatala lelei iai le fa'amoemoe e mafua ai ona faia sue'ga. E le o le sili e taua a ia aoga le o ane i le aoga Aso Sa ma fiafia atili ai latou i le a'oa'oina. Taua tele le toe silasila ane i tauloto o lo'o tu'uinaa atu i mataupu ua ma'ea, e toe tauloto fa'atasi e fanau.

FESILI: E tu'u atu pea le avanoa il au susuga e tapena ai fesili taua fo'i le fuafua i le fanau. Afai e gafatia suega tusitusi, ua lelei tele fo'i, 'ae afai e leai e lelei fo'i le auaua'i taito'atasi ane e tali gutu fesili, ina ia fa'ataua uma le malosi o iai i fanau i le taliina o fesili. O nai fesili la ia e fesoasoani il au susuga a le faiaoga mo le su'ega.

1. O le a le mea e maua e le tagata amiotonu?

Tali: O le manuia mai le Atua.

2. O le a le manaoga o le fai salamo mo le tagata?

Tali: 'Aua le muliumuli i le filifiliga a e amio leaga.

3. O le nofoa o ai lea e manatu le fai Salamo e 'aua ne'i nofo ai?

Tali: Nofoa o e tauemu.

4. O Tulafono a ai lea e mana'o le fai Salamo e naunau iai le tagata?

Tali: Tulafono a le Ali'i.

5. O le a la le mea o lo'o fa'atusa ai le tagata amiotonu?

Tali: Fa'atusa i le laau e toto i tafatafa ane o le vaitafe.

6. O le a le mea e o'o i le tagata amio leaga?

Tali: O le malaia.

7. O le a se mea o fa'atusa ai e le fai Salamo le tagata amioleaga?

Tali: O lo'o fa'atusa i aputi o saito e lelea i le matagi.

8. I le manatu o le fai Salamo, e tataua ona fa'atasi tagata amiotonu ma tagata amioleaga?

Tali: E leai.

9. Aisea e malaia ai le tagata?

Tali: Ona ua ia faia le amioleaga.

10. O mea uma e faia e le tagata fa'amata e silafia e le Ali'i?

Tali: Ioe, e silafia e le Ali'i ala o e amiotonu, 'ae fano le ala o e amioleaga.

11. O lo'o fa'atusa e le fai Salamo Iesu i le a?

Tali: Fa'atusa i le leoleo mamoe lelei.

12. Aisea ua fa'atusaina ai Iesu i le leoleo mamoe?

Tali: Aua o lana galuega na faia i le lalolagi, o le galuega lava fa'a leoleo mamoe.

13. O le le mea e tatau i le leoleo mamoe ona ia tauaveina?

Tali; O lona to'oto'o e ta'ita'i ai mamoe.

14. I le Salamo e 23 o le a se upu e tasi e fa'amatala ai le leoleo mamoe lelei?

Tali: Alofa.

15. O le fale o ai e nofo ai le tagata e usita'i ma fa'alogo i le leoleo mamoe?

Tali: E nofo i le fale o le Ali'i.

Afai e ma'ea le suega a'o totoe pea le taimi, ona fa'amalamalama loa lea i fanau fesili ma tali sa'o ina ia latou iloa le tulaga o iai a latou sailiiliga mo tali o le su'ega.

PESEPESEGA: Manaia tele 'ae toe fa'amanatu pese sa usuina i Aso Sa ua mavae o le masina o Aukuso.

TATALO: Fa'auma ia lenei Aso Sa o le fa'amanatu i le tatalo na a'oa'o mai e Iesu.

MANUIA LE TAPUAIGA O LENEI ASO SA.

ASO SA : SETEMA 03, 2023

MATAU : "O MATUA O FAIAOGA MUAMUA O LE FANAU

(ASO SA O LE TALALELEI)

TUSI FAITAU: FA'ATAOTO 1:7-9

SINI: Ia a'oa'oina fanau o matua lava o faiaoga muamua. O le mea lea e tatau ai lava ona fa'alogo ma usita'i i matua.

TAULOTO: O le mata'u i le Atua o le amataga lea o le Poto. Lo'u atali'i fa'alogaga mai ia i le a'oa'o atu a lou tama; 'aua fo'i e te tu'ulafoa'i le upu a lou tina

FESOASOANI MO LE FAIAOGA: Malo le soifua manuia, ua fa'atutu gata fo'i lenei taeao. Ua tatou taunu'u mai i lenei Aso Sa fa'apitoa ua taua o le; "Aso Sa o le Talalelei" fa'amanatu ai le o'o mai o le talalelei i Samoa. Manaia fo'i 'ae fa'amatala laititi i fanau le taua o lenei Aso Sa. O le Talalelei na suluia ai laufanua o Samoa ina ua taunu'u le va'alotu; Savali o le Filemu na o mai ai Viliamu, Papu, Fauea ma Puaseisei fa'atasi ai ma misionare na o latou taunuu i Sapapali'i Savai'i.

SINA FESOASOANI MO LE MATAUPU: O tusitusiga a le Poto o lo'o aumaia e le Tusi o Fa'ataoto, o lo'o matele lava i a'oa'oga i mea lelei e tatau ona ola ai. O le ata o lo'o aumaia ai le tu'ufa'atasiga o mataupu i le a'oa'oina o fanau ina ia maua le poto ma le atamai. O lo'o aumaia lava i se gagana masani e fa'ailoa mai ai o mea e tatau ona ola ai i aso uma. Fuaiupu ia na faitauina o lo'o amata a i le; **"O le mata'u i le Atua o le amataga lea o le poto"**. E leai se isi e maua ai le poto ua na'o le Atua lava. O a'oa'oga ma fautuaga mo fanau, ia fa'alogo i matua, le tama ma le tina, fa'alogaga fo'i i tagata matutua. Le mea lena lea e fa'amanatu mai e le tusi o Fa'ataoto i lenei taeao. **Lo'u atali'i e, fa'alogaga mai ia i le a'oa'o atu a lou tama; 'aua fo'i e te tu'ulafoa'i le 'upu a lou tina"**. Lea ua manino le uiga moni o le tatou mataupu o lenei Aso Sa e pei ona aumaia e la tatou faitauga. O matua lava o faiaoga muamua o le fanau. O le usita'i la i matua e matagofie lona taunuuga lea e fai mai ai le Poto; **"aua e fai ia mea ma pale matagofie i lou ulu, ma mea e asoa i lou ua"** Vaai la outou tamaiti i manuia e maua e le tamaitiiti e fa'alogo ma usita'i i

matua ma mata'u i le Atua. E pale ma asoa i matagofie, e manuia le olaga ma e le taumate lava e alofagia e tagata atoa ma le Atua.

AOAOGA:

1. E maua le poto o le tagata ina ua mata'u i le Atua.
2. O le aiga e amata ai le tau afuafuaina o le ola tuputupu a'e o le tamaititi.
3. Sili le fa'alogo ma usita'i i matua aua o la'ua o ulua'i faiaoga.
4. Fatu ane e lau susuga nisi a'oa'oga mo le fanau fa'amolemole.

PESE:

ASO SA : SETEMA 10, 2023

MATAUPU: "IA LELEI A OUTOU AMIO"

TUSI FAITAU: ROMA 12:1-2

SINI: "Ia iloa e le fanau le uiga moni o le amio lelei. ma ia lelei a latou amio aua e fiafia i ai tagata atoa ma le Atua.

TAULOTO: " 'Aua ne'i fa'ataga alofa, ia inoino i le leaga; ia pipi'i i le lelei." (Roma 1:9)

FESOASOANI MO LE FAIAOGA: Malo le onosa'i i lau susuga a le faiaoga, saunia ane se tatalo e amata ai le mataupu o lenei Aso Sa. Manaia tele pe a faitau i le Tusi Faitau ia malamalama tamaiti i le faitau pea o le Tusi Paia. O lo'o tele se fa'amanatu a le aposetolo mo le ekalesia i Roma ina ia tumau pea i le amio lelei.

FESOASOANI MO LE MATAUPU: O manatu ma lagona fa'aalia o le aposetolo o Paulo i lana tusi atu i le ekalesia i Roma, o lona naunauta'iga ia ola le ekalesia i le amio lelei. E le gata i lea ia ola tagata uma i le ola fa'a kerisiano moni ma ia fa'amamafaina le ola fa'atuatua ia Iesu Keriso le Alo o le Atua. O lo'o amata a le mataupu e sefulu ma le lua i le 'Ai'oiga a Paulo i le ekalesia ia lelei la latou amio. Atoa ma le fa'amanatu pea o le alofa mutimutivale o le Atua e ala ia Iesu Keriso. O le tu'uina atu o le tino i le Atua, o le manatua lava lea o le Atua, aua o le Atua e lelei lava ia. O le tu'uina atu o le tino i le Atua o le taulaga ola, e malie ma paia ma e tatau lava ona faia i aso uma o le ola. O ana a'oa'oga o le ola ia amio lelei, o le ola ia mama ma 'aua ne'i iai a se mea o le ola e fa'alavelave i le ofoina atu o mea sili mo le Ali'i. O lo'o atagia i le faitauga le naunau o Paulo ia manatua le alofa o le Atua e ala ia Iesu Keriso na tu'uina mai lona tino leai se agasala. O le mea fo'i lea e tatau ai ona tu'uina atu o tatou tino atoa i le Atua aua e malie e pa'ia ma o le taulaga ola fo'i. O le fa'ata'ita'iga lava lea na faia e le Ali'i o Iesu na aumai uma lona tino e ofo ina ia ola le tagata agasala. O lo'o manatu fo'i le aposetolo mo le ekalesia i Roma, ia 'aua ne'i amio fa'atasi ma tagata o le lalolagi. A 'ia toe liliu i le fuata'ina o loto ina ia manatua le Ali'i o Iesu, na ia faia a le finagalo o lona tama. Aua o le finagalo fa'aali mai o le Atua, 'ua na'o me aua lelei, ma le malie ma le atoatoa. Ioe o le autu lena o manatu o Paulo il ana tusi i Roma, ia ola uma tagata i le amio lelei ma le amio Atua. E tatau la ona tatou faia ma fa'aa'oa'o iai, ina ia 'aua ne'i galo le alofa o le Atua sa fa'ataunu'u e Iesu lona lava Alo pele. O le lelei o le amio ma 'aua ne'i mulimuli i le lalolagi tau fa'a sese, o le atoatoa fo'i lena o le amio lelei o le tagata.

A'OA'OGA: 1. O le pi'pi'i o le loto i le Atua e tupu ai pea le amio lelei.

2. E iloa a le tamaititi e usita'i ma fa'alogo e lelei fo'i lana amio.

3. O le amio lelei e alofagia ai e tagata atoa ma le Atua.
4. Fa'aopoopo ane nisi a'oa'oga o le mataupu o lenei Aso Sa.

PESE MA VIIGA : Pese 380 (fuaiupu 1)

Saunia ane se tatalo e fa'auma ai le Mataupu pe lelei fo'i le Tatalo a le Ali'i.

Manuia le Aso Sa ma Tapua'iga!

ASO SA : SETEMA 17,2023
 MATAUPU : "O IESU LE LEOLEO MAMOE LELEI"
 TUSI FAITAU : IOANE 10:1—6

SINI: Ia manino lelei fanau ua na'o Iesu lava le leoleo mamoe lelei, o le mea lea na fo'i ai lona ola mo ana mamoe. (tatou o tagata agasala)

TAULOTO: "O a'u o le leoleo mamoe lelei. E tu'u atu e le leoleo mamoe lelei lona ola mo ana mamoe. O a'u nei o le leoleo mamoe lelei; ua ou iloa a'u mamoe, ua iloa fo'i a'u e a'u mamoe." (Ioane 10:11,14)

FESOASOANI MO LE FAIAOGA: E le'i mamao atu lava ona tatou talanoa i le mataupu; "Ua fa'atusaina Iesu i le leoleo mamoe." Lea sa fa'asoa i le manatu o le fai Salamo, a'o lea ua aumaia le tala ia; Iesu le leoleo mamoe lelei. O lo'o i lau susuga lava le faitalia e fa'amatala ai le tala e tusa ma le vaai a Ioane latou. Manaia fo'i 'ae amata i se tatalo ona fa'atalanoa loa lea o le mataupu.

FESOASOANI MO LE MATAUPU: E ese le va'ai a Ioane ia Iesu, o le uiga o le manatu e maualuga lana vaai lea na ia fa'aaogaina ai le manulele o le aeto e fa'atusaina ai. Aua e lele maualuga ma mamao lana vaai, e tau fa'amatala ai le mamalu ma le silisili ese o Iesu. Ua fa'amatala e Iesu le Fa'ataoto i le leoleo mamoe lelei e fa'atusa lava ia te ia. Lea ua ia ta'utino o Ia le leoleo mamoe lelei. o lo'o aumai ai le ata o le leoleo mamoe alofa i ana mamoe. Molimau Ioane, o le le ui i le faitotoa 'ae alu atu i se isi vaega o le pa mamoe e ta'u o ia o le gaioi. E iloa gofie lava le leoleo mamoe e savali lava i le faitotoa o le pa mamoe. E iloa lelei e ana mamoe, aua ua masani mamoe i lona leo, ma ua logo fo'i mamoe pe a valaau e ia igoa o mamoe. E lelei lana ta'ita'iga o mamoe ma e le tu'uina atu e ia mamoe e o na'o latou, e tatau lava ona muamua atu le leoleo mamoe i ana mamoe. E le mafai ona mulimuli mamoe i se tagata ese aua e le masani i le leo o le mea lava lea e sosola ese mai ai. Sa le malamalama i latou na fa'alologologo i le Fa'ataoto lea a Iesu na fa'amatala. O tala na lalaga mo kerisiano o vaitau o Iesu, a'o tala e a'oa'oina ai tatou uma i o tatou taimi.

- A'oa'oga:**
1. O a lava mea sese a le tagata e fai, e leoleo a le Ali'i.
 2. O Iesu le leoleo sili mo le tagata.
 3. 'Aua le manatu o mea lelei e tatou te faia e le'o silafia e le Ali'i.

PESE: Alaga le si'ufofoga o le leoleo mamoe. (Pese masani Aoga Aso Sa)

Tatalo: Fesoasoani mai pea oe Iesu le leoleo sili mo'i matou, ina ia matou iloa o lo'o e leoleoina i matou uma. Tatou pea ma oe Agaga Paia e le aunoa. Amene.

Manuia tele sauniga o lenei Aso Sa ma malologa fa'a sapati.

ASO SA : SETEMA 24,2023
MATAUPU FA'AMANATU MASINA O SETEMA

FESOASOANI MO LE FAIAOGA: O lo'o i lau susuga lava le faitalia e amata ai le fa'amanatu o lenei masina. Manaia fo'i 'ae amata i le toe fa'amanatu o mataupu sa talanoaina ina ia mautinoa o lo'o manatua pea e tamaiti a'o le'i faia ni fesili e su'esu'eina ai i latou. Tauga fo'i le toe fa'amanatu o tusi faitau sa fa'aaogaina, ina ia taumafai e a'oa'oina pea i latou ina ia iloa faitau le Tusi Paia. Pule a lau susuga i le faiga o le suega pe auaua'i ta'ito'atasi e fesili ma tali pe fai fo'i se suega tusitusi. E ao lava fo'i ona fa'amanatu pea tauloto ma pese sa faia i mataupu ta'itasi o le masina o Setema. Saunia lava e oe ni fesili mo le suega, a'o nai fesili ia e fesoasoani mo le suega.

FESILI: 1. Aisea e taua ai le mata'u i le Atua?

TALI: *Aua o le amataga lena o le poto.*

FESILI: 2. O ai le faiaoga muamua i le manatu o le Poto?

TALI: *O matua.*

FESILI: 3. "Lo'u atali'i e, fa'alogo mai i le a'oa'o atu a lou tama." O le a le upu o lo'o aumaia le atoa o le fuaiupu lea?

TALI: *O le Fa'alogo.*

FESILI: 4 O le a le mea o lo'o mana'o le aposetolo e maua e le ekalesia i Roma?

TALI: *Ia ola i le Amio Lelei.*

FESILI: 5 O le tu'uina atu o le tino i le Atua, o le a lea i le manatu o Paulo?

TALI: *O le taulaga ola ma le malie.*

FESILI: 6. O le a le fa'amamafa a le aposetolo mo le ekalesia i Roma?

TALI: *Manatua le taulaga na faia e Iesu i lona soifua ofoina mai ina ia ola tagata.*

FESILI: 7. O le amio lelei o le mea e patino i le tagata a ia. Sa'o/Sese?

TALI: *Sa'o*

FESILI: 8. O ai le leoleo mamoe sili lea e taua e Ioane?

TALI: *O Iesu.*

FESILI: 9. Aisea e ta'ua ai Iesu o le leoleo mamoe lelei?

TALI: *Aua o le leoleo mamoe alofa na ia ofoina lona ola mo ana mamoe.*

FESILI: 10. E le mafai ona mulimuli mamoe i se leoleo mamoe e le masani ai. Sa'o pe Sese?

TALI: *Sa'o*

Saunia pea a tou susuga i faiaoga mo nisi fesili aua le su'esu'eina o mataupu o lenei fo'i masina. O nai fesili na e fesoasoani mo le tatou fa'amanatu o lenei taeao.

A ma'ea suega 'ae totoe pea se taimi, e lelei lava le fa'amanatu pea o a tatou tauloto atoa ai ma pese ina ia fa'amasani pea fanau i le taulotoina o mau mai le Tusi Paia aemaise lava i le a'oa'oina pea o pese e feso'ota'i ma le a'oga Aso Sa.

Tatalo: Fesoasoani mai lau Afio le Atua i lenei aso ma le feagai ai o fanau ma su'ega o lenei masina. Ia maua le augofie e su'esu'e ai ma le loto ina ia mau o latou loto i tala tau i lau Afio. Agalelei ma ii lenei aso ma ona sauniga uma. Ona o Iesu alofa Amene.

Manuia sauniga o lenei Aso Sa

////////////////////////////////////

ASO SA : NOVEMA 5,2023

MATAUPU : “O LE AOGA O LE POTO”
TUSI FAITAU : Fa’ataoto 2:10-15

SINI: *Fa’amatala lelei i fanau le aoga o le poto ma o le mea fo’i lea e taua ai le maua o le Poto. O le Atua a e foa’i mai le poto ina ia poto ai le tagata.*

TAULOTO: “A o’o le poto i lou loto, ma ua malie ia te oe le atamai; e fa’afeao le mafaufau ia te oe; e leoleo ia te oe le fa’autauta.” (Fa’ataoto 2 : 10,11)

FESOASOANI MO LE FAIAOGA: Taea manuia i a tou susuga i faiaoga, malo le usu ma le tauata’i i lenei fo’i Aso Sa. Tatou amata a i se tatalo, ona fa’agasolo lea o le tatou mataupu, E lelei fo’i pe a toe fa’amanatu fesili ma tali o le su’ega, ma ia ‘aua ne’i muta le fa’ailoa pea i tamaiti o Tauloto o tatou mataupu ua tuana’i. O le mea taua ia manatua e fanau mau mai le Tusi Paia e fai ma mea fiafia le taulotoina ‘aua ne’i o latou fa’agaloina. Manuia le fa’asoa mo fanau o lenei mataupu taua ma le aoga.

FESOASOANI MO LE MATAUPU: Pei lava ona ta’ua muamua i le isi a tatou mataupu i le tusi lava lenei o Fa’ataoto. O le ata o lo’o aumaia ai le a’oa’oga o mea lelei e tataua ona ola ai tagata i aso fai so’o. Lea fo’i ua manino o le tusi fo’i lenei o lo’o amata i le poto e maua ina ua mata’u i le Atua. O le aoga o le poto, e pei ona ta’ua e le tusi o Fa’ataoto, o le amata i le talia e le tagata o upu ma a’oaiga mai matua, aua o faiaoga muamua lava ia. Manatu o le mea fo’i lea na ole ai Solomona i le Atua ina ia fo’i mai le atamai, a’o le aoao atoa o lona mana’o ia maua le poto mai le Atua. Le poto lea fai mai ai le tusi o Fa’ataoto, a o’o le poto i le loto ma suamalie le atamai ona fa’afeao lea o lona mafaufau ma leoleo ia te ia le fa’autauta. O le fa’autauta lena e lavea’iina ai mai ala e leaga ai le tagata i mea fa’api’opi’o. Afai e le fa’ataua e le tagata le aoga o le poto, lona uiga o le a tu’ua ala tonu, ‘ae ui atu i ala pogisa. E naunau i fai o mea leaga ma olioli i le fa’api’opi’o o le leaga ma vaogatata ia latou amio. Taua le aoga o le poto, aua e le mafai ai lava ona toe faia uiga le lelei. O le mea fo’i lea e mafua ai ona naunau matua e u’una’i fanau i aoga ina ia maua le poto ma le atamai. O le mea lava ‘aua ne’i galo, o le Atua lava e maua ma fo’i mai le poto i le tagata.

- A’OA’OGA:**
1. E iloa gofie a le tagata poto ina ua fa’alogo ma usita’i i matua ma mata’u i le Atua
 2. E le maua gofie le poto, se’i loga ua fa’amaoni ona saili.
 3. O le toaga i le a’oga ma fiafia e fai mea aoga, o le maua fo’i lena o le poto.
 4. E fiafia matua ina ua poto ma i’u lelei taumafaiga a fanau.
 5. So’o se tamaititi poto a e le tali i se upu a matua.

Saunia ane e lau susuga a le faiaoga nisi a’oa’oga mo fanau, e lelei fo’i ‘ae amata i le fesili pea i tamaiti pe iai ni a’oa’oga ua latou maua mai i le mataupu.

PESE: O le poto e taua, i le olaga o le tagata,
Leai se mea e oi ai lou loto,
Pe a e mauaina o le Poto.
(Pese a le Faili a le Kukama)

Manuia tele sauniga o lenei Aso Sa.

ASO SA : NOVEMA 12, 2023

MATAUPU : “IA USIUSITA’I I POLOAIGA A LE ATUA”

TUSI FAITAU : Fa’ataoto 3 : 1-4

SINI: Ia iloa e fanau le taua o le usiusita’i i poloaiga a le Atua. Ia ola i le fa’asinomaga a le agaga e amata i le fa’alogo ma usita’i i matua.

TAULOTO: *‘Aua ne’i te’a ma oe le alofa ma le fa’amaoni, ia asoa ai i lou ua; ia e tusi ai i le papa o lou loto; ona e maua ai lea o le alofa ma le manuia lelei i luma o le Atua, atoa ma tagata. Fa’ataoto 3 : 3,4*

FESOASOANI MO LE FAIAOGA: Amata lava lenei aso ma le mataupu i se tatalo pu’upu’u e saunia e lau susuga. Talu ai e pu’upu’u le tusi faitau, e manaia pe a faitau fa’atasi ma fa’amasani ai tamaiti i le faitau pea o le Tusi Paia. Fa’amalamalama uiga o fuaiupu ta’itasi, ma ia iloa uiga o upu o lo’o i le faitauga.

FESOASOANI MO LE MATAUPU: O lo’o manino i le faitauga o le mataupu le toe fa’amanatu mai o le Tulafono e lima i le tusi o Esoto 20 a’o le fuaiupu e12; **“Ia e ava i lou tama ma lou tina; ‘ina ia fa’alevaleva ai ou aso i le nu’u o le a fo’aiina mai e le Atua ia te oe.”** Silasila la i le amataga o le mataupu, o lo’o amata i le fa’atauanau a le tama i lona atali’i ia ‘aua ne’i galo ia te ia ana Tulafono ma ia tausia fo’i ana poloaiga i lona loto. O le manatu o le tama o le usita’i o lona atali’i ia te ia ma ana Tulafono o le usita’i fo’i lona ma faia le finagalo o le Atua e manuia ai. O upu apoapoa’i ma timaiga fa’a matua alofa, o le fafauina o le ola o atali’i ma afafine o le nu’u filifilia o le Atua. A’o apoapoaiga mo le timata ma tapu’e pea ola o fanau i o tatou vaitau ma le ola o lo’o tulituliloa e fanau. Upu a le potu e fai ma anava tauave a le atali’i ma le afafine o le Atua lea e tau fa’avasega gata le ola i mea e manuia ai. O le mea fo’i lea e fa’a amuia ai le Poto i le tagata na te maua le potu ma le tagata na te maua le mafaufau aua e sili lona tau i ario aua o le tagata lea e fa’alogo ma faia le finagalo o le Atua. O le usiusita’i i poloa’iga a le Atua e tulu’i ai aso o le ola ma fa’atamaoigaina i oloa ma le viiga. O le usita’i ma fa’alogo i a’oa’oaiga a le tama ma le tina, o le usiusita’i lava lea ma faia le finagalo o le Atua.

A’OA’OGA:

1. E ola manuia le tama ma le teine e usita’i i matua.
2. E le se mea lelei le fai mai e faia le finagalo o le Atua, ‘ae le fa’alogo i matua.
3. E faigofie le usita’i i le Atua ma matua pe a faia mea uma ma le fa’amaoni.
4. E fa’apaleina ma fa’aeaina le tamaititi ma le teineititi alofa i matua ma le Atua.

E lelei fo’i le fesili pea i fanau po’o le a ni a’oa’oga ua mafai ona latou maua mai le tala o lenei Aso Sa.

PESE:

Fa’alogo ma usita’i aua e leai se isi mea e fialia ai le Atua pe a fa’alogo ma usita’i.

Saunia e se tamaititi se tatalo e fa’auma ai le mataupu o lenei Aso Sa. Manuia le aga atu mo le Tapua’iga fai tele a le ekalesia.

ASO SA : NOVEMA 19, 2023

MATAUPU : “IA FIAFIA E O I LE FALE O LE ALI’I” (Vaiaso o le Aso Fa’afetai)

TUSI FAITAU : SALAMO 122 : 1-5

SINI: *Ia malamalama tamaiti i le taua o le alu i le fale o le Ali’i. (Ia iloa o le falesa po’o le fale e fai tapua’iga o le fale lava lea e afio tumau ai le Ali’i)*

TAULOTO: Na ou fialia ina ua latou fai mai ia te a’u, tatou te o i le fale o le Ali’i. ***Salamo 122:1***

FESOASOANI MO LE FAIAOGA: Talu ai o lenei vaiaso ua amatalia o le vaiaso o le fa'afetai i le Atua i mea uma ua na faia mo i tatou i le ola, aemaise lana fo'ai e ala i fua o fa'atoaga ma meaalofa foa'i mai e tausi ai lo tatou ola. O le mea lava lea e tatau ai ona amata i se tatalo fa'afetai pea i le Atua. Lelei fo'i 'ae saunia e lau susuga a le faiaoga.

FESOASOANI MO LE MATAUPU: Fai mai le tatou mataupu o lenei Aso Sa, "Ia fiafia e o i le fale o le Ali'i." O fesili fa'atupu manatu; Aisea lava e naunau ai e o i le fale o le Ali'i? O le a se mea taua e maua i le alu i le fale o le Ali'i? 'Ae tatou te le'i talanoa la i le tatou mataupu, se'i aumaia a le tala a le fai evagelia o Luka e amata ai le fa'asoa o lenei taeao. Fa'amauiina i le mataupu e lua a'o le fuaiupu 42 se'ia o'o i le fa'aiuga o le mataupu. O lo'o fa'amatala ai le malaga a Iesu ma ona matua fa'atasi ai ma toatele o e na o i Ierusalem ma le tausamaaga fai mai ina ua ma'ea ona toe foi lea peita'i e le'i fo'i ane ai Iesu. Sa tau saili ua leai lava na toe fo'i a Matua o Iesu e saili Iesu, e maua atu o saofa'i mai Iesu i totonu o le malumalu ma fa'alogologo i a'oa'oga a a'oa'o ma le 'au ositaulaga sili. Fai atu lea o Maria ia Iesu; Aisea ua e fa'apea mai ai i a i maua? Ua ma fiu e tau saili oe? Tali Iesu; Aisea na o oulua saili ai ia te a'u aua e tatau ona 'ou i le fale o lo'u Tama. O lea fo'i le manatu o Tavita e pei ona aumaia e le Lau Salamo lea 122; le manaoga tu'uina atu mo le nu'u o le Atua ina ia fai ma mea fiafia le alu i le fale o le Ali'i. Isaraelu ua le sagatonu lagona ma manatu aua o lea ua tu'ua Papelonia ma ua fo'i. O lo'o iai a le lagona o tagata i le ola sa ola ai a'o fa'aaunuu i nu'u ese. Lea ua taumafai Tavita ina ia tata'i loto o le nu'u uma e aga'i i Ierusalem o lo'o iai le malumalu o le Ali'i e tapua'i ai i le Atua. A'o lea fo'i le tauanau a le talalelei mo i tatou fanau i lenei fo'i gasologa o lo tatou ola. O le fiafia e sau i le fale o le Ali'i aua e maua ai tala o le ola, tala fa'a fiafia loto. O le fiafia e alu i le falesa e le toe mafaufau ai i se isi a mea le lelei o le ola.

A'OA'OGA:

1. Ia fai ma au mea fiafia le alu i le fale o le Ali'i.
2. 'Aua le faia le falesa ma fale e te ta'alo ai, fai au facebook 'ae leai se fa'alogo i le faifeau ma vaega uma o le lotu.
3. Ia iloa uma e outou o le falesa, o le fale e sa ona faia ai se isi lava mea, 'ae na'o le tapua'i ai a i le Atua.
4. Ia maua uma e tatou tamaiti le fa'ata'ita'iga sili na faia e Iesu o le su'e atu e ona matua o lo'o nofo i totonu o le fale o lona Tama.

Manaia fo'i le fesili i fanau atonu o iai ni a'oa'oga ua latou maua mmai le tala aemaise fo'i lau susuga a le faiaoga mo nisi a'oa'oga taua mo fanau e fa'aopoopo ane e lau susuga.

PESE: Sau ta o ma a'u i le fale o lo'u tama,
I le fale o lo'u tama,
I le fale o lo'u tama,
Sau ta o ma 'au i le fale o lo'u tama,
O lo'o iai le fiafia.

ASO SA : NOVEMA 26, 2023

MATAUPU FA'AMANATU O LE MASINA O NOVEMA.

SINI: O avanoa e toe fa'amanatu ai mataupu sa feagai ai ma le masina o Novema, o le toe maitau pea po'o manatua e fanau tala sa fa'amatalaina i lenei masina atoa. Taua le nofomau pea o ia tala i o latou loto, ma ua alagata ai ona su'esu'eina i latou e ala i se su'ega e tapena lelei e a outou susuga faiaoga.

FESOASOANI MO LE FAIAOGA: O lo’o i lau susuga lava a le faiaoga le fa’atautu i le fa’atinoina o le su’ega o lenei masina. E le afaina pe faia se su’ega tusinga po’o le auau’ai ta’ito’atasi e tali gutu ni fesili ua saunia. Afai fo’i e te manatu e toe fa’amalamalama mataupu ina ne’i galo i fanau ua lelei fo’i lea faiga. E pei ona fa’ailoa atu i le amataga o lo’o i lau susuga lava le tapenaga ma le fa’amoemoe autu ia iai se aoga mo tamaiti. E lua faiga ua taumafai e fesoasoane atu ai.

(1). O FESILI MA TALI:

Fesili: 1. O le a le mea o lo’o naunau le tusi o Fa’atautu ia maua e le tagata?

Tali: *Ia maua e tagata uma le poto.*

Fesili: 2. Aisea e taua ai ia Solomona le mauaina o le poto?

Tali: *E taua aua o le mea fo’i lea na ia ole ai i le Atua.*

Fesili: 3. O le a se va’aiga e iloa gofie ai le tagata poto?

Tali: *E iloa gofie ina ua fa’alogo ma usita’i e le gata o matua a’o le Atua.*

Fesili: 4. Se mea tatau le tausia o poloa’iga a le Atua?

Tali: *Ioe, e tatau it agata uma ona tausia poloaiga a le Atua ma ola ai.*

Fesili: 5. O le Tulafono e fia o lo’o fa’amanatu mai i le mataupu o Novema 12?

Tali: *O le Tulafono e lima. “Ia e ava i lou tama ma lou tina, e fa’alevaveina ai ou Aso i le nu’u o le a foai’ina mai e lou Atua ia te oe.”*

Fesili: 6. O le a se mea e maua e le tagata e usita’i i poloaiga a le Atua?

Tali: *E tu’u tulu’i aso o lona ola.*

Fesili: 7. Aisea e tatau ai ona fa’afetai pea tagata i le Atua?

Tali: *Ona o le Atua o le alofa lava ia.*

Fesili: 8. O le a le mana’o o le tupu o Tavita i le nu’u o Isaraelu?

Tali: *Ia fiafia e o i le fale o le Ali’i.*

Fesili: 9. O le a le fale ua fa’atusa iai le fale o le Ali’i i nei ona aso?

Tali: *O le falesa.*

Fesili: 10. E tatau ona avea le falesa ma fale e fai ai nisi faiga ese mai le lotu?

Tali: *E leai, o le fale e tapua’i sa’oloto i le Atua’*

(11). E lelei fo’i le sue’ga e fa’amanatu ai tauloto o mataupu o lenei masina. ‘Aua ne’i tuua le manatua e tamaiti o mau mai le Tusi Paia lea ua fai ma tauloto.

1. Fa’atautu 2 : 10, 11; “ A o’o le poto i lou lotu, ma ua malie ia te oe le atamai, e fa’afeao le mafaufau ia te oe; e leoleo ia te ‘oe le fa’autauta.”

2. Fa’atautu 3 : 3, 4; “ ‘Aua ne’i te’a ma oe le alofa ma le fa’amaoni, ia asoa ai i lou ua; ia e tusi ai i le papa o lou lotu; ‘ona e maua ai lea o le alofa ma le manuia lelei i luma o le Atua, atoa ma tagata.”

3. Salamo 122 : 1; “ Na ou fiafia ina ua latou faimai tatou te o i le fale o le Ali’i.”

Manaia tele fo’i ‘ae fa’amanatu pese o mataupu ta’itasi o lenei masina. O nai fesoasoani na mo le fa’amanatu o lenei masina. Pei a ona ou fai atu i le amataga o lo’o i lau susuga lava le faiga o le su’esu’eina o fanau mo lenei masina. Afai o totoe pea sina taimi e lelei fo’i le toe fa’amalamalama le suega.

Paia. O le mataupu o lenei aso, “O le Talalelei e olioli ai nu’u uma” Fetaui lelei ma le vaitau o le Kerisimasi ma le fa’amanatuina o le fanau mai o le pepe o Iesu.

FESOASOANI MO LE MATAUPU: O le fa’amatalaina o le tala a Luka, amata mai le poloaiga a Kaisara Aukuso ina ia tusia uma igoa o le lalolagi. O le taumafai e faitau tagata na auai atu ai ma Iosefa ma Maria mai le aiga o Tavita. Fai mai le tala ua taunu’u i le aai e fai ai le tusiga igoa, ua le maua se avanoa e ulufale ai i le fale talimalo. Ona tau saili lea o se isi nofoaga e mapu ane iai i le malulu o le po, ua maua na’o le fale o manu, le fale povi. O iina na mapu ai ma o iina fo’i na fanau ai le fafine, o lea lava po na vaa’ia ai e leoleo mamoe le fetu pupula uiga ese. O lea va’aiga na fefefe ai leoleo mamoe, aua e fou lea mea, fai mai na fa’aali iai le agelu a le Atua, ma ia fa’apea atu; “**‘Aua tou te matata’u, aua fa’auta, ou te aumaia ia te outou le tala lelei o le olioli tele e o’o mai i le nu’u uma; aua o le aso nei ua fanau ai ia te outou i le aai o Tavita le Fa’aola, o ia o le Keriso o le Ali’i.’**” (Luka 2:10,11). Le talalelei lena ua fa’aali mai e le agelu, ma ua fa’anatinati atu leoleo mamoe na leoleo i lena po e saili po’o fea o fanau ai Iesu. Sa le’i faigata la latou sailiga ona na mulimuli a i le fetu i sasa’e, ua maua ma iloa ai le pepe ua ‘aui i le ie a’o taoto i le pusa e sasa’a ai mea’ai a manu. Na o latou ifo na auina atu iai a latou meaalofa, ona toe fo’i lea ma le tala fiafia e olioli ai nu’u uma. O le talalelei fo’i lea o lo’o tatou fa’auauina pea lona tala’iina atu, ma o le tala fiafia lea e fa’aolioliina ai tagata uma e fa’atuatua ma talitonu fa’amaoni i le Atua.

A’OA’OGA:

1. ‘Aua ne’i mama ia i tatou le taua o le talalelei na logo mai, ia fai ma tala e olioli ai pea i aso uma.
2. Ia fiafia e alolofa atu ma ave iai se meaalofa mo le kerisimasi.
3. Ia ‘aua le fefe ma popole vale pe a vaa’ia se mea fou po’o suiga fou, a ia matau pea ma le toto’a po’o lea sona uiga.
4. Ia ‘aua ne’i le taliaina tagata e mana’omia se fesoasoani.
5. ‘Aua ne’i pei o Kaisara e fia iloa Iesu, ‘ae ese le mea o fafau mai **tua**.

PESE: Olioli i le Ali’i o lou malosi lea,
Olioli i le Ali’i o lou malosi lea,
Olioli i le Ali’i o lou malosi lea,
Olioli i le Ali’i o lou malosi lea.

Tali: Pese osana, pese osana, pese osana,
I le Tupu o Tupu.

***Tatalo:** Fa’afetai tele le Atua, ina ua maua le tala lelei e olioli ai le lalolagi uma. Tatala o matou loto e fiafia ai pea e talia tala o le ola o lau afio. Ma ia e alofa mai e fa’alautele ina ia maua le malamalama i uiga o au afioga. Fa’amagalo i matou ma fa’amanuia fanau mo lo latou ola tutupu a’e. Ona o Iesu ua ala atu ai le tatalo. Amene.*

MANUIA SAUNIGA O LENEI ASO SA.



ASO SA : TESEMA 17, 2023
MATAUPU FA’AMANATU O LE MASINA O TESEMA

SINI : *Ia iloa e fanau le taua o le manatua pea o mataupu o lea masina ma lea masina.*

FESOASOANI MO LE FAIOGA : Ia i lau susuga lava le faitalia e fa'atino ai le faiga o fa'amanatu mo le toe masina o lenei tausaga o Aoga Aso Sa. E lelei fo'i 'ae fa'amanatu tauloto ma pese, 'ae manaia fo'i pe a toe fa'amanatu uma mai ai mataupu sa feagai ma le afa mulimuli o lenei tausaga. E pei lava ona 'ou ta'ua e saunia lava e lau susuga se faiga ina ia teufatu ai pea e fanau mataupu uma sa talanoaina.

O NAI FESOASOANI MO LE FA'AMANATU:

Tali mai i le sa'o po'o le sese, ma tali mai fesili ia:

1. O le pepe ua fanau mai ua fa'aigoa ia Iesu. Tali: Sa'o
2. O le to a Maria, o le to ia Iosefa. Tali: Sese
3. Emanuelu pe a fa'amatalaina, Ua ia te'i tatou le Atua. Tali: Sa'o
4. O le pepe ua fanau mai o le fa'aola lava lea o le lalolagi. Tali: Sa'o
5. O leoleo mamoe na vaai'a le fetu pupula mai sasa'e. Tali: Sa'o
6. O Iesu na fanau i le fale talimalo. Tali: Sese
7. Sa faigofie le sailiga a leoleo mamoe ona sa mulimuli a i le fetu pupula. Tali: Sa'o
8. O le a le mea na iloa e leoleo mamoe i le po, a'o leoleo a latou mamoe?

Tali: O le agelu a le Ali'i, ma le pupula o le Ali'i ua pupula fa'ata'aliolio mai o latou luga, ona matua fefefe ai lea oi latou.

9. O le a le upu a le agelu ina ua ia iloa leoleo mamoe ua fefefe tele?

Tali: "Aua tou te matatau; aua fa'auta ou te aumaia ia te outou le talalelei o le olioli tele e o'o ma ii le nu'u uma.

10. O le a le upu a le agelu ia Iosefa na fa'aali mai i le miti?

Tali: "Iosefa e, 'aua e te fefe ina aumai ia te oe o Maria lau ava; aua o lana to mai le Agaga Paia lea.

11. Fa'atumu le fuaiupu i upu ia; **taupou, tane, Emanuelu;**

Fa'auta, e to le _____, ma fanau mai le tama _____, latou te fa'aigoa fo'i ia te ia o _____.

12. Fa'aaoga upu e fa'atumu ai le fuaiupu; **agelu, matata'u, talalelei, olioli, nu'u, fanau, Tavita, Fa'aola, Keriso.**

Ona fai atu lea o le _____ ia te'i latou, 'aua tou te _____; aua fa'auta, ou te aumaia ia te outou le _____ o le _____ tele e o'o ma ii le _____ uma; aua o le aso nei ua _____ ai i le aai o _____ le _____, o ia o _____ le Ali'i.

Fa'aopoopo ane e lau susuga a le faiaoga nisi fesili e su'esu'eina ai fanau aua o le toe fa'amanatu lea o lenei fo'i tausaga fa'a le aoga Aso Sa. Fa'amanatu fo'i pese pe afai e lava pea le taimi, manaia fo'i 'ae toe fa'amanatu tauloto ina ia iloa e fanau le taua o le taulotoina o mau mai le Tusi Paia. Fa'amasani fo'i latou e tatalo ina ia iloa le taua o le ola tatalo aua o le so'otaga lea o le tagata i le Atua.

TATALO: Fa'afetai le Atua, aua o lea ua taunu'u manuia i le fa'ai'uina o Aoga Aso Sa o lenei tausaga. Fa'afetai i lou fa'aaogaina o so matou fa'atauva'a, e fai ai ma faiaoga a'oa'o atu tala o lau Afio i fanau. Fa'afetai fo'i i fanau i lo latou fiasia e omai ma fa'alogi i tala tau i lau afio. Fa'amagalo i matou uma ma 'aua ne'i tosina o matou loto i mea le lelei o le Ola ua o'o mai i lo matou atunu'u. Fa'amanuia fanau ma i



Tautua Printing Press
Congregational Christian Church of American Samoa
1 Kanana Fou Street, Box 1537
Pago Pago, American Samoa 96799
www.efkasonline.org

